

er
Schwarzblawe Gall/ ein zweyfachte grosse Blasen/ kleinen weissferbigen
Kogen.

Er hat eben so wohl Zähñ als der Karyff/ die seynd aber anderst ge-
staltet/ daß sie stehen all einanderen nach in dem Riffbaggen/ reichend
ihm in Schlund/ deren seindt auff jeder seiten fünf/ sehr lang zu oberst
schwarz/ etwas abgewest wie des Ebers/ in seinem Kuggen Fleisch/
seind breite Grät/ wieder Lamhirzen gehöñ formieret/ etliche haben
4. 5. 6. Zingen/ etliche seind wie Schaufflen vnd nicht zertheil.

Das zehende Capitel.

Von dem Balchen Edelfisch Weißfisch Eglin.

Von dem Balchen.

Diese Fisch ob sie fast gleiches Geschichts/ form vnd Natur/ haben sie
doch gar vnderscheidliche Nammen/ nach den Orthen/ nach der
grösse/ vñnd nach ihrem Alter/ werden auff latein/ Lauaretus, Alba
carulea, Bezola, Leuciscus Halecula, Albula parua, minima, bey
den Italienern Balbi vnd Cauezzaligenant/ bey den Teütschen vñnd
Schweyzeren Edelfisch/ Edel-Albulen/ Adelfisch/ Blewling/ Brats-
fisch/ Felcken/ Felchen/ Blaw-Felchen/ Balchen/ Balchenen/ Baal/
Allböck/ Renchen/ Gangfisch/ Hägling/ Hägele/ Augelin/ Lauge-
lin/ Nacht-Fischlin/ Pfarren/ Pflisling/ Buch-Fisch/ Spisling/
Seelen/ Wydel-Fisch/ Stüben/ Watt-Fisch/ Halb-Fisch.

Halecula das ist Hägling/ Hägele heist man zu Frenburg in Becken-
land Pfarren/ zu Lucern Nacht-Fisch/ daß sie zu Nacht gefangen wer-
den/ vñnd meldet Gesñ daß der Blöwling im ersten Jahr (wie er von
einem Lucerner Fischer vernommen) ein Nacht-Fisch genamsset werd/
wann er vmb Johannis im Sommer Fingers lang erwachsen seye/ vñnd
daß der Nacht-Fisch vñnd kleinst Albulen/ minder grüen auff dem Kopff/
dann die grössern Albulen/ haben keine Zähñ/ werden nur zu Nacht in
40. oder 50. Claffieren tieff gesetzten Netzen gefangen/ wann heiter Him-
mel/ steigen sie tieffer hinab/ wann er tuncel lassen sie sich besser hin-
auff/ werden scharen weiß zwar nicht allenthalben im See/ sondern mei-
stens vmb Werenchweyl zc. gefangen.